

مسرحية ساد



بقلم

محمد خطاب

الشخصيات :

سالم موظف بمديرية التربية والتعليم

هدي الام

حسنا الابنة

مروان دكتور جامعي

موظفي التربية والتعليم :

مدحت مدير التربية والتعليم — محمود شريك في المشروع

شوقي — تامر - راضي - سعيد

الضابط

عمالء : يوسف - داود

مسرحية ساذ

يدخل سالم حاملا براد الشاي . يصب الشاي وهو يبسم . يفتح الراديو [صوت المذيع يتحدث عن غزو أمريكي للعراق . يجلس مذهولا وهو يستمع إلى الخبر بانصات .]

سالم : العراق كمان مش كفاية فلسطين . لا حول ولا قوة الله . [يغلق الراديو .
يمسك جريدة . يتصفحها . معلقا] وأدى الصهاينة دمروا جزء من مسجد صلاح الدين .. وقتلوا كثير من الفلسطينيين لا رحمة ولا دين .. والعرب نايمين [يتصفح باهتمام] مفيش أمل الأسعار تنزل شوية .. حتى سعر الذهب في

العالي .. [يطوى الجريدة . يتجه ناحية المرأة ينظر جاهدا] الشعر الأبيض
كثر في راسك يا سالم .. الظاهر الزمن جرى بيك و أنت مش واخذ بالك
[صوت خبطات على الباب] مين اللي جاى دلوقتي [يفتح الباب. يدخل
رجلان] مدحت بيه المدير العام (صمت) حضرتك شرفتنى بالزيارة أخيرا
.. معلى الشقة مش قد المقام .. أعملك شاي .. أنا عندي شاي معتبر .. أروح
اعمل كوبيتين (يستوقفه) حتى عشان الضيف اللي بيشرنا لأول مرة برضه
(صمت) هو حضرتك حصل منى حاجة .. زعلان منى في حاجة ..
حضرتك مصدق الكلام اللي بيقوله شوقي عنى(صمت) أنا عمري ما قولت
أنى زعلان لان شوقي خد ترقية ما يستحقهاش وان ده كان دورى انا ..
بالعكس أنا مقتنع برؤية سيادتك وبعد نظرك..ورغم إن سيادتك ما بتحترميش
قدام الموظفين .. الأصغر منى سنا.. بس أنا متأكد انك بتعمل ده عشان
الموظفين تعرف انك مبتتهاونش فى العمل .. ورغم انك دايمما تجازينى ..
إلا أنى متأكد انها معزة مش اكثر (صمت) طب اعمل حاجة تانى غير الشاى
مدحت : خلصت

سالم : تحت أمرك يا أفندم

مدحت : (يشير لمحمود) هو ده يا محمود بيه..سالم اخلص موظف عندي

سالم : (مندهشا) أنا

مدحت : بس هو كلامه كثير

سالم : أبطل كلام خالص يا أفندم

محمود : باين عليه إنسان طيب

سالم : طيب جدا

مدحت : لو طلبت منك خدمة تعملها ليه .. متكسفينيش

سالم : رقبتي .. أنا نفسي أقدم أي خدمة لسعادتك من زمان

محمود : الموضوع اللي جاين نكلمك فيه .. هيغير حياتك كلها بس لو
فتحت مخك معنا

سالم : افتح مخي .. افتحوا أزي

محمود : تفتح مخك .. يعنى تفهم كلامنا كويس وتقولنا إذا كنت مستعد
تساعدنا وللا لا

مدحت : ولو وافقت هاتأخذ ترقيةك المتأخرة .. غير الحوافز .. وفوق ده كله
رضايا

سالم : رضاك ده أعظم جائزة ممكن احصل عليها يا مدحت بيه

مدحت : اتفقنا .. محمود بيه بيعمل معايا مشروع

سالم : (لمحمود) ونعم الاختيار

محمود : يا بنى .. هيه جوازة هتحدى بضاعة

مدحت : المهم يا سيدي .. وعشان نقدر نمول المشروع لازم قرض من البنك

سالم : فكرة كويسة

محمود : وعاوزينك تبقى ضامن لينا في البنك

سالم : (قلقا) بس القرشين اللي حاطهم في البنك .. مخليهم للجواز

محمود : يا بنى إحنا مش عاوزين فلوسك

سالم : (جانبا) الحمد لله

مدحت : أنت ناوى تتجوز

سالم : (خجلاً) ايوه

مدحت : ولاقيت العروسة

سالم : لسه

محمود : يا سيدي جوازك عليه أنا

سالم : صحيح

مدحت : طبعا .. أنت هتبقى من رجالتنا

سالم : رجالتكم

محمود : هتمضى الضمان .. وللا عندك مانع

مدحت : لو مش عاوز .. نشوف حد غيرك

سالم : عاوز

مدحت : (يمسك الموبايل . يتصل . لسالم) افتح للضيوف

سالم : (يفتح الباب. يدخل رجلان) شوقي

شوقي : (لحسام) اتفضل يا أستاذ حسام

حسام : ازيك يا مدحت بيه .. ازيك يا محمود بيه .. جاهزين

محمود : جاهزين وللا إيه ياسالم

سالم : أنا جاهز

شوقي : وأنا شرحه

حسام : علي خيرة الله (يخرج الاستمارات) وقع يا أستاذ سالم هنا (يمضي

سالم) وأنت يا أستاذ شوقي (يوقع شوقي)

شوقي : جميل خالص .. اى خدمات تاني يا أستاذ مدحت

مدحت : شكرا (جانبا لحسام) عمولتك هتوصلك لحد عندك

حسام: وأنا ها ريحك قوى .. مبروك يا جماعة (يخرج حسام)

مدحت : (لسالم) أنا مش هانسالك موقفك معانا . اعتبر النهاردة أجازة

(يخرج مدحت ومحمود وشوقي)

سالم : النهاردة أجازة .. دي تبقى أول أجازة اخدها من أول ما أتعينت

.. عمرات ولا ارتحتش .. حتى الأجازات الرسمية ما باعرفش اعمل فيها إيه ..

بأنام لحد جسمي ما ينمل .. طب النهاردة إجازة ها عمل فيها إيه (خبطات

على الباب) ويا ترى ده مين .. يكونوا لغوا الإجازة (يفتح الباب . تدخل

سيده في العقد الرابع من عمرها جميلة) سالم : مدام هدي

هدى : ازيك يا أستاذ سالم .. أنت مستغرب أني جايلك في وقت زي ده

سالم : أنتي تشرفي في أي وقت .. هو المدير أدي لك أجازة النهاردة

هدى : اتأخرت في الصحيان غبت (صمت) أنا شوفت الأستاذ مدحت

المدير العام وضيوف معاه عندك قولت أطمئن عليك .. هو فيه حاجة

سالم: لا أبدا الأستاذ مدحت كان عاوزني أضمنه في قرض من البنك

هدى : وضمنته

سالم : وأنا أقدر أقوله لا

هدى : حد يضمن مدحت بيه .. ده راجل ذمته أوسع من الكوتش

سالم : تفتكري انه مش هيسدد

هدى : ده منشف ريق ناس كثير .. إيه اللي وقعك معاه

سالم : أنا عارف .. كل ما أشوفه أحس إني مسلوب الإرادة .. وما أقدرش غير

إني أقول حاضر

هدى : تورط نفسك في قرض .. عشان خايف من المدير العام

سالم : (قلقا) كمان ما أقدرش حد يقصدني في خدمة وأقول لأ

هدى : شوف أنا موظفة في التربية والتعليم من أمتي .. ما قابلتش حد في

طيبتك .. بس الطيبة ما تنفesh في الزمن ده (صمت)

سالم : (غاضبا) ما أعرفش غير اني اكون نفسي .. انا عشت عمري ما رفضتش

طلب لحد حتي لو كان الطلب هيئذيني ما أقدرش ما أقدرش

هدى : انا ملاحظة انك عايش لوحدهك .. لا بتزور حد ولاحد بيزورك

سالم : ومين هيزورني لا ليه اهل ولا اصداق

هدى : و ليه لحد دلوقتي ما اتجوزتش .. اهو تلاقي حد يسليك يماً عليك
حياتك (بحزن) أنا جربت الوحدة وعارفة مرارتها .. بعد ما مات جوزي
وسابني وحيدة مع بنتي حسناء

سالم : (مغيرا الموضوع) واضح انك كنتي بتحبينه
هدى : كان هو النور اللي باشوف بيه في ضلام الدنيا (تتنهد) مات ورأسه
على صدري .. زى ما كان بيتمنى طول عمره (صمت) ارتاح من هموم
الدنيا

سالم : مات إمتي
هدى : من خمس سنين .. خمس سنين وحيدة .. لا أنيس ولا ونيس .. خمس
سنين عايشة ويا ذكرى لاتدفي ولا تريح

سالم : الوحدة وحشة فعلاً .. أكيد بنتك مالية عليك حياتك
هدى : بنتي مسيرها تفارقني لجوزها .. ما جاوبتنيش عن سؤالي بخصوص
الجواز

سالم : (حزينا) أنا كنت زي أي شاب باحلم بالعش الهادي والعروسة الأصيلة
اللي تحافظ عليه وتخلف ليه ابن يكون امتدادني
هدى : وإيه اللي جري

سالم : خطبت واحدة عن طريق والدتي الله يرحمها .. كانت أول تجربة
عاطفية ليه .. و ذي ما يحصل لما نخطأ الاختيار جات قبل الجواز بأسبوع
وظهرت علي حقيقتها ..

هدى : رفضت تتمم الجواز
سالم : مش بس كده .. دي مرضيتش تتديني الشبكة ومبلغ كنت
شايله معاها للجواز .. رفضت ترجع أي حاجة .. وداست علي قلبي ببرود

.. واتجوزت في نفس الميعاد شخص تاني (صمت) كانت صدمة كبيرة
وخصوصا لشاب في مقتبل العمر انكفيت علي ذاتي وقررت
تأجيل الموضوع نهائيا
سالم : أنا نسيت أقدم لك حاجة تشريها
هدى : أنت محتاج لحد يملا عليك حياتك و مش كل البنات ذي اللي
الانسانة اللي خدعتك .. لسه الدنيا بخير (بتوتر) طولت عليك وأدخلت في
حياتك الخاصة .. بس دي أول مرة ارتاح فيا لحد غريب عني وافتح له قلبي
بالشكل ده

(تدخل حسناء فتاة في مقتبل العمر . ملابسها متحررة)

حسناء : ماما أنتي هنا وأنا باد ور عليكي

هدى : معلش يا حبيبتي أتأخرت عليكي .. سلمى علي عمو سالم

حسناء : هاي

سالم : هاي

هدى : أنتي مش فاكرة عمو سالم زميل ماما في الشغل اللي كلمتك

عنه

حسناء : والواحدة هتفتكر إيه وللا إيه بس يا ماما

سالم : وأنتي في سنة إيه

حسناء : في الثانوية العامة

سالم : ليكي حق تنشغلي

حسناء : انتة فاكركني مشغولة بالمذاكرة (تضحك)

هدى : حسناء عيب تكلمي عمو كده

سالم : سيبها يا مدام هدي أنا أحب أتعرف علي أفكار الشباب ..

أمال أنتي مشغولة بايه

حسنا : برقصة شاكيرا حتي بص (ترقص . سالم ينظر بنهم)
هذي : (تجذبها بعنف) كفاية كده
حسنا : إيه يا ماما .. أنا عملت حاجة غلط .. مش أنتي اللي علمتيني الرقص
وقولتي ليه عشان الرشاقة
هذي : اسكتي يا بت عيب
حسنا : ماما يا أستاذ سالم بترقص جنان
سالم : صحيح يا مدام
هذي : (بخجل) صحيح .. بس عمري ما رقصت غير للمرحوم
حسنا : أنا بقي نفسي أرقص للناس كلها .. وأتمايل قدامهم والآهات تحرق
صدورهم
هذي : شوفت يا أستاذ سالم البنت وعما يلها .. أنا خلاص ما عدتش
مستحمله شقاوتها أكثر من كده
سالم : مايصحش بنت جميلة زيك ترقص قدام أغراب
حسنا : طب ما أنا رقصت قام حضرتك وعنيك كانت ها تكلني
هذي : (تصفعها) قليلة الأدب (تخرج حسنا غاضبة)
سالم : كنت قاسية عليها
هذي : مش شايف بتكلمك ازاي
سالم : بنت صغيرة ومش مقدرة قيمة اللي بتعمله واللي بتقوله
..تعرفي يا مدام هذي
هذي : قولي هذي
سالم : صعب .. ما اتعودتش ارفع الكلفة بيني وبين حد
هذي : هو أنا أي حد

سالم : (مغيرا الموضوع) تعرفي اني طول الفترة اللي اشتغلتها في التدريس
ما ضربتشي تلميذ

هدي : معقولة .. أكيد تلاميذك ملايكة .. يعني ما بيتشاقوش .. و مطيعين

سالم : المدرس المتمكن من مادته بيعرف أزاى يستولي علي عقول
تلاميذ يفقهوهم سنا وتجربة وحكمة

هدي : رغم أنني مش مدرسة بس اقدر اجزم لك .. إن عيال اليومين دول
مش ملايكة ولا بيحترموا السن ولا التجربة ولا الحكمة اللي كنا بنحترمها
زمان .. دول ذي ما أنت شايف بنتي بيحترموا خبرة روبي
وتجربة هيفاء وحكمة شاكيرا

سالم : لأن الأهل انشغلوا عن أبناءهم بلقمة العيش .. ودي الكارثة لأن
دول الشباب اللي في أيدهم مصير الأمة وهما اللي مفروض يحافظوا عليها
ويحموها من الفكر الصهيوني اللي ساد العالم وهيقضي علينا كلنا لو ما
انتبهناش لخطورته وقاومناه

هدي : ده كلام مثالي محتاج لناس مؤمنه بيه .. محتاج لطلبة تحترم
المدرس .. بنتي بتحكي ليه كل يوم عن مواقف ومقالب تشيب بيعملوها في
المدرسين

سالم : انا فاكر في بداية تعييني ان الطالب اللي كان بيخطأ أو بيتعدي
حدود الأدب كنت بأعنفه بشدة (بأسى) بعد المعتقل لاقيت إن صعب
تحاسبي الأولاد علي ذنب مجتمع بحاله .. مجتمع منهار من الداخل ..
مجتمع ما بيحترمش حق المواطن في التعبير عن ذاته من غير ما يهينه
ص . مروان : يا جماعة ياللي هنا

هدي : ده صوت الدكتور مروان

سالم : ادخل (يدخل مروان)

مروان : ازيك يا أستاذ سالم .. ازيك يا مدام .. ما تأخذونيش يا جماعة
(لهدي) أنا روحت لك الشقة أكلمك بخصوص إيجار الشهر ده قالت ليه
حسنا انك هنا

هدي : جيب الإيجار يا أستاذ مروان .. متأخر عليك شهرين
مروان : أنا كنت جاي اعتذر لك عن إيجار الشهر ده كمان اصل الظروف
هدي : (مقاطعة) ظروف تاني .. هيه الظروف بتاعتك ما بتنتهش
مروان : خلاص مستقبلي هيتحدد كمان يومين .. وساعتها هتاخدي فلوسك
ومعاهم جواب شكر

هدي : هات الفلوس من غير شكر .. دي فلوس يتامي يا دكتور مروان
مروان : كلامك صح (لسالم) أستاذ سالم أعذرني إذا كنت دخلت بيتك كده
لا احم ولا دستور
سالم : أنت شرفتي

هدي : نسيت أعرفكم ببعض (لسالم) دكتور مروان دكتور بكلية هندسة
ومتخصص في الإلكترونيات

مروان : وصاحب اختراع هيهز الدنيا
سالم : اختراع إيه

مروان : أتوصلت لطريقة أطور بيها رادراتنا بحيث تكتشف طائرات الشبح ..
تقنية الطائرات دي .. وازاي ممكن نصنع زيها

سالم : اختراعك ده لو صحيح هيفيد البلد في الظروف الصعبة اللي بنمر بيها
مروان : ما هو ما حدش راضي يسمعي .. كلهم واقفين ضدي
هدي : ليه .. ما دام دي حاجة هتفيد البلد

سالم : ورؤسائك في القسم .. رأيهم إيه
مروان : (حزينا) اللي بيسخر مني و اللي بيتهمني بالجنون

هدي : بعد إذنكم (تخرج هدي)

سالم : (لمروان) أنفضل

مروان : أنا مش عاوز اقطع عليك خلوتك

سالم : خلوة إيه يا راجل .. ده أنا باد ور علي حد أتكلم معاه من زمان

مروان : إذا كان كده معلش (صمت) أنا سمعت انك موظف كبير في التربية

والتعليم

سالم : الكبير صغير في التربية والتعليم

مروان : مش فاهم

سالم : شوف انا قضيت عمري كله في التربية والتعليم .. أتعب واشقي و

أشتغل بكل ضمير والنتيجة إيه الموظف الصغير بيتعامل باحترام اكر مني ..

عمري ما اشتكيت من أي ظلم وقع عليه ولا أي تجاهل في الترقيات ..

مبدأي في الحياة .. كل اللي يريد ربحنا يكون ..

مروان : المفروض صوتك يوصل لرؤسائك .. تقولهم عن الظلم اللي واقع

عليك

سالم : وأقلق راحتهم ليه

مروان : اسمح لي دي تبقي

سالم : (مقاطعاً) سلبية

مروان : لا مؤاخذة

سالم : كل اللي في الشغل بيقولوا كده .. في أول تعييني بالتدريس .. كان

عندي طموحات أني أغير العالم .. كنت بأدرس مادة الدراسات بطرق

مبتكرة كانت أكبر متعة عندي .. لما أتكلم عن تاريخ بلدي ومقاومتنا

للاستعمار علي مر التاريخ .. حاولت أحول حصتي لمنبر للطالب يقول فيه

رأيه بصراحة في اللي بيجري في بلده .. والأحداث اللي بتجري حوا لينا

مروان : بالشكل ده العيال تحب حصة التاريخ وتعشق الجغرافيا .. أنا فاك
إن حصة الدراسات كانت مملة بسبب جفاف المعلومة اللي بيديها لنا مدرس
المادة .. أكيد المدرسة كافئتك علي جهودك

سالم : خمس سنين

مروان : مكافئة

سالم : اعتقال

مروان : (مندهشا) اعتقال

سالم : خمس سنين أتعلمت فيهم الأدب مسحوا تاريخ العالم من ذاكرتي ..
مفضلش غير تاريخ الذل والصمت المفروض علينا من آلاف السنين ..عرفت
ليه بنقدس الزعماء في كتب التاريخ

مروان : ليه

سالم : لان الأفواه كانت مكمنة والقلم ما كانش بيكتب الا عن عظمة الحاكم
وانسانيته وانجازاته اللي ابتده منها التاريخ وانتهي عندها وصدقه المتناهي
وشفافيته اللي يحسد عليها .. من يومها وأنا حاطت جذمة في بقي وساكت
بأطيع أوامر الرؤساء بكل أمانة .(ساخرا). ما هو الرؤساء دايمًا علي حق
مروان : القهر أسوأ أمراض الدكتاتوريات .. أنت تعرف أكثر حاجة مزعلاني
إيه

سالم : أنهم مش سامعينك

مروان : إن ليه أكثر من عشر كتب في السوق عن العلم والتفكير العلمي وإ
زاي نبي قلعة علمية وصناعية تطور من خلالها صناعتنا وتخلينا من الدول
المتقدمة (صمت) عارف رد عليه أعداء النجاح قالوا إيه

سالم : أكيد رحبوا بالفكرة

مروان : قالوا إني سببت البحث العلمي وتفرغت للفلسفة والكلام غير
المجدي

سالم : مع إنها أفكار جميلة

مروان : ولما قدمت البحوث بتاعتي حسيت إن فيه ناس من مصلحتها البلد ما
تستفدش من أبحاثي

سالم : ده لأنك بتسحب البساط من تحت التناولة والموظفين المتعنين
بالواسطة وهما ما يملكوش أي مواهب .. أزمة بتعاني منها البلد كلها .. أزمة
بتحرم البلد من زهرة شبابها المخلصين واللي بيملكوا العلم (صمت) و ناوي
تعمل إيه

مروان : أديني قاعد ومنتظر .. منتظر وقاعد .. تعرف أنا لو حبيت أبيع أبحاثي
للدول الأجنبية ها كسب ملايين .. بس ساعتها بلدي هتتحرم ثمرة تفكير
ابنائها اللي علمتهم وربيتهم .. مثلاً من يومين ظهر ليه أثنين شكلهم من دولة
أجنبية رغم إنهم بيتكلموا عربي لبلب .. عرضوا إنهم يشتروا أبحاثي بملايين
الدولارات لصالح مؤسسة علمية أجنبية اسمها "ساز ٢١"

سالم : وقبلت

مروان : رفضت ومن ساعتها وهما بيطاردوني

سالم : وهما عرفوا بالبحث منين

مروان : من موظفين بايعين ضما يرهم ليشتري

سالم : فيه سؤال محيرني

مروان : اسأل

سالم : رغم الدرجة العلمية الى إنت حاصل عليها وكتبك المنشورة في

السوق .. إلا إنك

مروان : (مقاطعا) مش قادر أدفع الإيجار

سالم : معذرة

مروان : أنت معذور الناس ما بتشوفش في الأستاذ الجامعي غير مظهره و وضعه المميز .. ما يعرفوش إن الباحث بيصرف اللي كل اللي يملكه علي البحث العلمي .. عندك أنا مثلاً بعث حته الأرض اللي أملكها في البلد .. حتى عفش شقتي بعته عشان أقدر أواصل أبحاثي (صمت) مجنون مش كده

سالم : بالعكس أنت العاقل الوحيد في عالم مجنون

مروان : أسيبك أنا .. ورايا شغل كتير لازم أخلصه

سالم : أنا عندي اقتراح

مروان : اقتراح ايه

سالم : بأقول لو توافق تيجي تسكن معايا .. يبقى ليا عظيم الشرف .. واهو

نوفر أجرة شقة

مروان : مش عاوز أتقل عليك .. أنت راجل بتحب الهدوء وأنا حياتي

متلخبطة .. كتاب هنا ومرجع هناك .. ونظام صارم في الأكل والشرب

(مترددا) لا لا خليني ذي ما أنا

سالم : وجودك معايا يسعدني .. أنا عايش وحدي ومحتاج لونس

مروان : بس

سالم : لابس ولا حاجة .. أنت تروح تجيب حاجتك وتيجي .. أنا هاستناك

مروان : خلاص ما دمت عاوز كده (يخرج مروان . تدخل هدي وخلفها

رجلان)

هدي : أفضلوا .. الأستاذ سالم اهو

يوسف : أهلا أستاذ سالم .. أنا يوسف (يشير لداود) وده اخويا داود

سالم : اهلا بيك (لهدي) خير

داود : خير ما تقلقش كده .. إحنا عاوزين نأجر شقة

(ينظر سالم لهدي . تشير بعلامة الرفض)

سالم :بس إحنا ما عندناش مكان فاضي

يوسف : إحنا عاوزين الشقة ثلاث تيام بس (يحاول سالم الكلام يقاطعه يوسف)
وأي مبلغ تطلبه تحت أمرك

سالم : طب عدي علينا كمان يومين .. نكون فكرنا

هدي : باين عليكم خوات

يوسف : إحنا مصريين عشنا عمرنا كله في أمريكا بنشتغل في مؤسسة علمية

هناك .. وجايين يومين سياحة .. محبناش نزلهم في اوتيل

داود : فضلنا نقضيهم في مكان شعبي جميل زي الحي بتاعكم

هدي : (تأخذ سالم جانبا) ايه رأيك الناس دي شكلها مش مريحني

سالم : ولا أنا .. هما قالوا لك حاجة

هدي : أصلهم سألوني عن الدكتور مروان في الأول

سالم : (مندهشا) مروان

هدي : شكلهم مش مريحني

سالم : وإذا كانوا عاشوا عمرهم بره .. ايه اللي فكرهم بالبلد دلوقتي ويعرفوا مروان منير

هدي : لا وعاوزين يسكنوا هنا بالذات

سالم : أنا بديت اقلق يكونوا هما اللي بيطاردوا مروان

يوسف : (لداود) أنت متأكد إن هو المكان اللي ساكن فيه الهدف

داود : إلا متأكد .. دي معلومات متخصصة بتقوم بيها شركة ساذ ٢١ من سنتين

يوسف : البحث اللي يقوم بيه الدكتور مروان لو ما وقعش في ايدينا هاتخده

شركات تانية

داود : وساعتها بيتنا هيتخرب

يوسف : هما مالهم بيتوشوشو في ايه

داود : ما رديتوش علينا

سالم : (ليوسف) هو فيه مكان كان ساكن فيه الدكتور مروان

يوسف : (باهتمام بالغ) كان ساكن .. وراح فين

سالم : المكان

داود : المكان ما يهمناش اللي يهمننا هو الدكتور مروان

هدي : (لسالم) أنت قولت ليه اسم الدكتور مروان

سالم : ما أعرفش (لداود) أنت عارف إن اللي بيسيب السكن الخاص

وخصوصا اللي في غموض الدكتور مروان ما بيسبش خط سيره .. إنما انتوا

عاوزينوا في إيه

يوسف : فين الأوضة اللي كان ساكن فيها

(سالم وهدى ينظران إلي بعضهم باستغراب)

يوسف : انتوا نسيتموا المكان (تدخل حسناء)

هدى : (منفعلة) روعي يابت من هنا دلوقتي

داود : وده معقول .. أمال مين اللي هيدلنا علي شقة الدكتور مروان

حسنا : مش الدكتور مروان هينقل مع الأستاذ سالم

هدى : كان ده كان .. هو خلاص مشي من هنا

حسنا : أزاي ده أنا لسه شايفاه بيجهاز عزاله .. ده حتي قالي

داود : قالك إيه

حسنا : قالي أنتي جميلة

هدى : يا بنتي اسكتي الله يهديكي

حسنا : هو أنا قولت حاجة غلط

سالم : لا أبدا .. روعي أنتي دلوقتي

يوسف : وده معقولة الأمور هتفضل معانا لحد ما نقابل الدكتور

مروان

حسنا : متشكرة

سالم : انتوا عاوزين إيه من الدكتور مروان

يوسف : أنت بتتكلم بالنيابة عنه

حسنا : هو فيه إيه .. مش فاهمة حاجة

يوسف : (يخرج سلاح يصوبه ناحية حسنا) هتتكلموا وألا نموت الأمورة

دي (حسنا يغمي عليها)

سالم : انتوا مين .. مش ممكن تكونوا مصريين

داود : باين عليك ذكي (يدخل مروان حاملاً شنطة)

سالم : اهرب يا مروان (مروان يخرج مسرعا وخلفه يوسف وداود)

هدى : هو إيه اللي بيحصل

سالم : ما أعرفش بس الأيام الجاية هتبقى صعبة علينا كلنا

ستار

المشهد الثاني

المنظر : حجرة تضم ثلاث مكاتب أمام كل مكتب كرسيين.. يجلس تامر

وسعيد

تامر : عرفت يا سعيد الأستاذ سالم عمل إيه

سعيد : عمل إيه قول يا أبو الأخبار

تامر : بتتريق عليه طب مش قايل

سعيد : قول .. قول و النبي

تامر : لا مش ها قول .. أتحايل عليه شوية

سعيد : لو قلت الخبر اللي عندك .. ها قولك الأخبار اللي عندي

تامر : أخبار إيه .. قول

سعيد : ها قولك بس تقولي

تامر : قول و بلاش رخامة

سعيد : سالم

تامر : اشمعني

سعيد : عرفت بخبرتي سبب حزنه وتعاسته طول الفترة اللي فاتت

تامر : هو كان تعيس الفترة اللي فاتت .. صحيح ده كان قرب يكلم نفسه .. إيه

السبب

سعيد : أصله ضامن المدير العام في قرض من البنك

تامر : وطبعا المدير العام يأكل مال النبي .. طالع واكل نازل واكل
سعيد : الراجل يا ولداه رجله حفيت بين مكتب المدير ومكتبنا عشان يقبض
المرتب المتأخر له ثلاث .. شهور من غير فائدة .. المدير العام نازل يمطوح
فيه .. ها كنت جاى تقول إيه
تامر : كنت جاى أقولك إن (صمت)
سعيد : ما تقول خرس تليه
تامر : شوقي هو كمان ضامن البيه المدير
سعيد : شوقي أبو الفذلة يقع في المطب ده
تامر : هو حد يقدر يقول للبيه المدير لا
سعيد : حقه يا ابني .. ده كان وداه وراء الشمس .. ربنا يحفظنا من شروره
(يدخل سالم مهموما)
تامر : إيه يا أستاذ سالم لسه يرضه
سالم : (مفزوعا) لسه إيه .. هو أنت تعرف حاجة
تامر : هو فيه حد ما يعرفش .. المديرية كلها عارفة
سعيد : هو فيه حاجة بتستخبي اليومين دول .. ده أحنأ في عصر الاتصالات
والإنترنت
سالم : هيه وصلت للإنترنت
تامر : سعيد قصده إن الموضوع بتاعك كل المديرية عارفاه .. من أول
الضمان لدوختك وأنت بتلف وراء المدير العام مدحت بيه عشان يديك
مرتبك اللي مستولي عليه لصالح البنك
سالم : اعمل إيه .. قالي اضمني ضمته .. امضي مضيت .. اعمل إيه تانى ..
مرتبتي حاجز عليه ليه ثلاث شهور وكل ما أروح له .. يراضيني بقرشين
ميكفونيش غداً يومين ما بالك بباقي الشهر .

تامر : (بنظرة ذات مغزى لسعيد) ده غير معاملته الوحشة ليك (يضع سالم يديه علي رأسه)

سعيد : ده بيعاملك كأنه مداينك مش أنت اللي مداينه .. إيه الزمن الوحش ده .. خلاص ماعدش فيه لارحمة ولا وفاء الله يكون في عونك يا أخي
سالم : (مقاطعا) بس .. كفاية
سعيد : أحنأ كنا بنواسيك

تامر : يلا يا تامر نروح ناطر ونشيش عل القهوة بمرتبنا (لسالم) عن إذناك (يخرج سعيد و تامر)

سالم : أنا اللي جيبت ده كله لنفسي .. حنة مطب .. مطب. ده بير غويط وقعت فيه ومش عارف أطلع أزاي منه ... ده راجل مقتدر وانا مش قده .. أنا راجل عشت عمري كله جنب الحيط لا (يدخل هدي و راضي)
راضي : مالك يا سالم .. هو برضه لسه ما قبضكش مرتبك
سالم : (يبتسم بمرارة) مرتب .. أنا خلاص فقدت الأمل أنى أقبض شلن واحد من مرتبي

راضي : كلمته أكثر من مرة وأنا بأقبضه مرتب الشهر والحوافز اللي نازلة ترخ عليه ذي المطرة بمناسبة وبغير مناسبة
سالم : وقالك إيه

راضي : يقولي حاضر بابتسامة صفراء .. اسمح ليه يا سالم أقولك إن دي غلطتك مش غلطته

سالم : غلطتي إني حبيت اخدمه

راضي : حد يضمن حد النهاردة .. وخصوصا إذا كان ذي مدحت بيه
سالم : والحل

راضي : ربنا عنده كتير (تدخل هدي)

راضي : اسيبكم عشان الحق اقبض باقي الموظفين .. بعد اذنكم (يخرج
راضي)

هدي : لسه ما فيش اخبار عن مروان

سالم : مفيش أي اخبار .. بس كويس اننا اخفيا الاوراق المهمة

هدي : أنا خايفة يعملوا فينا حاجة

سالم : لو كانوا ناويين يعملوا .. كانوا عملوا في التلات شهور اللي عدت

هدي : لو ياسوا هيعملوا .. أنت مش شايف كل مرة يجوا يسألوا يبقوا زي

المجانين .. ويفضلوا يقلبوا الشقة ويفتشوا كل حته فيها

هدي : نفسي اعرف هما بيدوروا علي إيه بالظبط

سالم : ممكن تكون حاجة (يدخل مروان . يبدوا عليه الإرهاق)

مروان : سالم .. هدي

سالم : مروان أنت بخير

مروان : الحمد لله

سالم : اقعد ارتاح . (صمت) . وكنت فين الفترة دي كلها

مروان : اهو من مكان لمكان .. استخبي هنا شوية وهنا شوية

هدي : مين الناس دول .. وعاوزين منك إيه

مروان : مجرمين بيطاردوني وعاوزين يسرقوا ابحاثي

سالم : بلغت البوليس

مروان : محدش اهتم ببلاغي .. وسخروا مني .. قالوا ليه فاكر نفسك احمد

زويل

هدي : ده عيبنا مفيش حد بياخد الأمور علي محمل الجد (صمت) مين

الناس دول

سالم : دول اللي قتلوا مشرفة عالم الذرة وعلماء كتير من خيرة ابناء البلد ..
وهيفضلوا يقتلوا لحد ما البلد تصحي وتفوق وتبدأ تعرف قيمة ثروتها البشرية
وتعرف تستثمرها

هدي : يا مصيبيتي .. ما دام الموضوع وصل للقتل يبقى حياة بنتي في خطر
مروان : ما تخافيش الناس دي عاوزاني أنا .. مش أي حد ثاني
هدي : ما تزعلش مني يا دكتور مروان .. بس أحنا طول عمرنا عايشين في
حالنا .. لا عمرنا أذينا حد ولا حد فكر في آذانا

مروان : وانا عمري ما اذيت حد .. كل ذنبي اخلاصي لبلدي
سالم : دكتور مروان واجهة مشرفة لينا ويستحق اننا نساعده
هدي : واحنا في ايدنا إيه

مروان : أنا خفت وأخذت أبحاثي كلها من الشقة و أخفيتها عند زميل مخلص
زيكم .. محدش ضامن عمره .. خدي يا سالم
سالم : (يسلمه سي دي) إيه ده

مروان : دي نسخة من أبحاثي علي السي دي ده .. إخفيها
سالم : بس أنا

مروان : أنت الوحيد اللي ممكن أثق فيه وأأتمنه علي أبحاثي
سالم : وأنت ناوي تعمل إيه دول مش هيسكتوا إلا لو خدوا منك
البحث أو

مروان : يصفوني .. عشان كده أنا قررت أختفي اليومين دول لحد ما
جهة رسمية تبني البحث بتاعي

هدي : صوت المدير العام .. استئذنكم لحسن ده راجل شراني
(تخرج هدي . يدخل مدحت و محمود وشوقي)

مدحت : (لسالم . بغضب) إيه الكلام اللي بتقوله عني يا أستاذ

محمود : بقول نسمعه بدل ما نعلمه

مدحت : هيقول إيه بس يا محمود بيه .. هو عاد فيها كلام ما خلاص
الإنسان اللي كان مصدر ثقة داير يقول في المديرية كلها أنني نصبت
عليه وخليته يضميني في البنك.. لا وواكل عليه مرتبه .. إيه يعني ثلاث
شهور ما اديتهمش ليك .. ظروف وهدتدي .. وبعدين آدي شوقي عنده
نفس ظروفك ما اشتكاش ليه

شوقي : ايوه نفس الظروف .. ولا عمري اشتكيت

سالم : بس أنا مش لاقى آكل ومحتاج للمرتب .. وشوقي مدير مكتبك
وبيشغل معاك في مشاريعك لكن أنا

محمود : بسيطة نشغلك معانا بس اصبر شوية

سالم : اللي تشوفه حضرتك .. بس اقبض أي مبلغ أتقوت منه (ينظر لمروان)

مروان : أنا دكتور مروان صديق الأستاذ سالم

شوقي : (لمدحت) حضرتك كنت منبه ان مفيش حد من الموظفين

يستقبل ضيوف اثناء ساعات العمل

سالم : الدكتور مروان كان عاوزني في موضوع وماشي

مدحت : بره الشغل مش هنا .. أنت عارف القرار اللي اصدرته بخصوص

الزيارات .. ولأنك قدوة لزملائك .. مخصوم من مرتبك ثلاث تيام

سالم : بس أنا

مدحت : عارف إن مرتبك محجوز في البنك ادفع من الحوافز وأنا ابقي

أحاسبك علي المبلغ الإجمالي .. مبسوط عن إذنتكم (يخرجوا)

مروان : مش عارف أقولك إيه

سالم : ده مش ذنبك أنت .. أنا اللي استاهل كل اللي يجري ليه

بس لكل شيء نهاية

مروان : هتعمل إيه

سالم : ما أعرفش .. بس أكيد الوضع ده مش هيستمر الحق أنت اختفى عن

عيونهم .. قبل ما يوصلوا ليك

مروان : أنا متشكر علي وقفك معايا

(يخرج . يحاول سالم إخفاء السي دي . يدخل تامر يتابع سالم وهو يخفي

السي دي)

سالم : يا سلام دلوقتي بس الواحد ارتاح .. محدش يقدر يعرف مكانه

تامر : أنا

سالم : (مرتبكا) أنت .. أنت إيه

تامر : أنا أول واحد عرف معدنك الأصيل و الله ودايما باشكر فيك وأقول

انك عون للمزنوقين والمفلسين زيي

سالم : عاوز إيه يا أستاذ تامر

تامر : قرشين كده تفك زنقة أخوك

سالم : منين ما أنت عارف الظروف

تامر : بقي كده

سالم : لو حد سأل عليه .. أنا رايح لحد الأستاذ راضي وراجع

(يخرج سالم)

تامر : بقي مش عاوز تسلفني .. عامل فقير (يدخل سعيد) طب

هاعمل فيك مغرز هيطلع من عينك

سعيد : حصلك إيه يا تامر بتكلم نفسك

تامر : تعالي دور معايا بسرعة

سعيد : أدور فين وعلي إيه

تامر : نويت أعمل في صاحبك مغرز

سعيد: سالم وناوي تعمل إيه

(تامر يبحث في مكتب سالم . يخرج سي دي)

تامر : شايف يا سعيد اللي أنا شايفه

سعيد : إيه ده

تامر: سي دي

سعيد : وايه يعني

تامر : تفتكر .. راجل مش متجوز بيعمل إيه بحاجة زي دي

سعيد : فهمتك .. بس لالا .. سالم مش بتاع حجات زي دي

تامر : بسيطة أحمنا ناخذ السي دي ده ونخبه .. وبالمره نتفرج عليه

سعيد : طب ولو دور عليه

تامر : وهو شافنا واحنا بناخده .. وبعدين هنشوفه بسرعة و نرجعه ولا من شاف

ولا من دري .. يلا ميعاد الانصراف قرب

سالم : وبعدين إيه الحل . . لحسن يكونوا مراقبينه .. أخ السي دي

(يبحث عنه) الله راح فين .. لحقوا وصلوا له .. يا نهار أسود كده حياتي في

خطر وبعدين إيه العمل .. أهرب أروح فين ده أنا ما ليش حد في الدنيا

خالص .. (يدخل يوسف وداود) انتوا مين .. وعاوزين إيه

يوسف : مالك يا أستاذ سالم .. أنت مش عارفنا وللا عاوز تنكر معرفتنا

سالم : وايه الفرق .. ما دام النتيجة واحدة وهي أنني بتمني إن دي تكون

آخر مرة أشوفكم فيها

داود : (يقترب من سالم) فين صاحبك

سالم : صاحبي مين

يوسف : (مصوبا السلاح نحو سالم) أنت هتستعبط

سالم : ما أعرفش .. انتوا عاوزين منه إيه

يوسف : هو مكانه فين .. قول

سالم : ما اعر فش

داود : أحنا شوفناه وهو خارج من المديرية

سالم : ولما انتوا شوفتوه .. ما ممسكتهوش ليه

داود : ما لحقناهوش .. كان عارف اننا بنتابعه زاغ مننا (يدخل تامر وسعيد)

سعيد : فينك يا سالم .. أوعي تكون زعلت (ينظر إالي يوسف وداود) ما

خدتش بالي ان معاك ضيوف

يوسف : أحنا مش ضيوف أحنا أصدقاء سالم من زمان .. مش كده يا سالم

سالم : كده (يلاحظ وجود الديسك في يده . يشير له بالإصراف)

سعيد : مالك بتشاور بإيدك ليه .. عاوزنا نمشي (ينظر داود له نظرة وعيد

فيتراجع) مش تعرفنا بضيوفك

سالم : روح دلوقتي يا سعيد

سعيد : خلاص ما تزعلش نفسك

تامر : أحنا غلطانين اللي جايبين لك اللي وقع منك

(ينظر يوسف باهتمام ناحية السي دي يصبوب سلاحه نحو سعيد)

داود : وريني كده اللي في ايدك

سالم : لا يا سعيد

داود : يبقي هو ده اللي بندور عليه .. (لسعيد) هات السي دي باقولك

سعيد : مش فاهم إيه الحكاية

سالم : إهرب يا سعيد .. (يهرب سعيد)

داود : وراه يا يوسف (يخرج يوسف)

تامر : أنا ما ليش دعوة(داود يخرج سكيننا) الحق يا سالم

(داود يطعن سالم ويهرب)

تامر : الحقوني .. سالم إنتقل

سالم : ما تخافش أنا بخير الحق سعيد

(يخرج تامر. يدخل مدحت وشوقي وباقي الموظفين)

مدحت : إيه الدوشة دي .. أنت تاني يا سالم

شوقي : ده معور نفسه

راضي : يا جماعة هاتوا الإسعاف .. الراجل بينزف

سالم : أنا مش مهمم .. الجرح بسيط .. أنا خايف علي سعيد للمجرمين

يعملوا فيه حاجة

راضي : إتسند عليه .. أوصلك للمسعف (يخرج راضي وسالم)

شوقي : وبعدين يا مدحت بيه .. لورا ح سالم المستشفى هيبقي فيها سين

وجيم ومين دخلهم وفين بيناتهم

مدحت : ومين قال إن الموضوع هيوصل للمستشفى .. روح للمسعف

وفهمه الموضوع

شوقي : هوا يا أفندم (يخرج شوقي)

مدحت : وبعدين سالم ده مشكلة .. طول ما هو هنا ما بيحيش من وراه غير

المشاكل .. خايف ليلفت لنا الأنظار .. هاوديه مدير مدرسة في أي قرية

(تدخل هدي)

مدحت : إيه الأخبار

هدي : الإسعاف نقلته المستشفى

مدحت : مين اللي اتصل بالمستشفى

هدي : أنا

مدحت : بتخالفني اوامري

هدي : ما هو أنا ما اقدرش اسيب زميل يموت

مدحت : يموت ليه .. الجرح سطحي ومش مستاهل الشوشرة دي كلها .. ده
غير البوليس هيجي هنا ونخش كلنا في سين وجيم
هدي : يعني حضرتك خايف علي نفسك ومش خايف علي حياة الراجل
المسكين

مدحت : الله الله وأنت محموقه عليه ليه
هدي : لانه زميل كلنا معاه عيش وملح (يدخل شوقي)
مدحت : كلتي معاه عيش وملح بس
شوقي : الأستاذ سالم له معزة خاصة جدا عند مدام هدي
هدي : أنا عارفة تلميحاتكم السخيفة تقصدوا بيها إيه
شوقي : الظاهر أنتي اللي مش عارفة انك بتكلمي المدير العام
هدي : دي عارفها .. زي ما أنا عارفة ان المدير العام جه هنا بعد ما دفع
رشوة ثلاثين الف جنيه لناس في الوزارة ده غير النهب اللي بتنهبوه من
المديرية

مدحت : هيه حصلت انك تسبيني وتتهميني علي بالرشوة والسرقه .. شوقي
حولها للتحقيق

هدي : وانا موافقة ومستعدة اقدم الدليل علي كل كلمة قولتها
شوقي : أنا باقول إيه يا بيه
مدحت : قول يا وش السعد
شوقي : باقول نسايسها احسن لحد ما نعرف إيه اللي تعرفه بالضبط .. وبعدين
نتصرف علي هذا الأساس
مدحت : (لهدي) روعي شوفي شغلك دلوقتي وبعدين لينا حساب .. اتحركي
وبعدين نتكلم (تخرج هدي)
شوقي : سعادة البيه

مدحت : عايز إيه

شوقي : المطبعة السرية

مدحت اشمعني

شوقي : حضرتك كنت وعدتني تحط اسمي فيها .

مدحت : مش قبل ما تعرف الهانم عارفه إيه .. ومخبئه إيه

شوقي : بسيطه .. أنا هاجيب لحضرتك التفاصيل كلها حالاً (يخرج شوقي)

مدحت : والله عال يا هدي بقي بعد ما اشتريت الوظيفة من دم قلبي ..

عاوزه تضيبي مستقبلي وأرجع أطلع السلم من الأول .. أنا ها ربيكم كلكم يا

كلاب (يخرج مدحت . يدخل راضي وهدي)

هدي : (تمسك اوراق) معقولة كل دي سرقة حصلت في عهد مديرنا

المصون .. ده ما سابش بند الا وسرق منه

راضي : حتي فلوس الأنشطة المخصصة للطلبة سرق منها وفارض إتاوة علي

مديرين المدارس بياخد منهم نسبة كل سنة من مخصصات الأنشطة والصيانة

.. كده أو ينقلهم لأماكن نائية .. حتي أباطرة الدروس الخصوصية بياخد منهم

نسبة مقابل حمايتهم .. ده غير بيع اسئلة الإمتحانات للمدرسين كل سنة ..

وغيره وغيره

هدي : إيه الراجل ده ما بيشبعش طالع واكل نازل واكل

راضي : واللي يعارضه يكدره وينقله لمكان نائي

هدي : أنت خايف

راضي : أنا ساعدتك بما فيه الكفاية .. عشان الغلبان سالم .. اللي لسه طالع

من المستشفى .. خليني أنا بعيد عن الموضوع .. أنا عندي عيال بأعلمهم

ومرتبي ما يستحملش خصومات .. ولا استحمل النقل

هدي : عارفة يا أستاذ راضي .. ومتشكرة علي تعبك معايا و أنا بقي هاعرف
أتصرف كويس (يخرج راضي)

هدي : يا حبيبي يا سالم .. ما كنتش اعرف إني باحبك كده إلا النهاردة
(يدخل مدحت)

مدحت : بقي الحكاية كده

هدي : مدحت (صمت) أنت هنا من امتي

مدحت : من أول يا حبيبي يا سالم

هدي : (لنفسها) الحمد لله

مدحت : كده .. عيني عينيك

هدي : عاوز إيه مني يا شوقي

شوقي : كنت بتتامري مع راضي علي إيه .. وإيه الأوراق دي (يحاول أن
يخطفها)

هدي : أنت مجنون (يدخل تامر و سعيد)

شوقي : ما هو أنا مش ممكن .. اسمح لك تأذينا كلنا بغاوتك

هدي : خايف يا شوقي لتروح السجن أنت و السيد المدير العام

شوقي : ها ها .. وريني الورق اللي في ايدك

هدي : الورق ده هيروح للنيابة الإدارية (يحاول استخدام العنف)

تامر : ابعده ايدك عنها يا شوقي .

سعيد : أنت بتتفالح علي واحدة ست

شوقي : أنا كنت باحاول انقذها من المصير اللي بيستناها .. لو فضلت راكبة

دماغها واتحدثت المدير العام

سعيد : خايف عليها يا شوقي

تامر : طول عمرك كلب المدير العام

شوقي : ما تغلطش يا تامر أحسن لك أنت عارف أنا ممكن اعمل إيه
تامر : هتعملوا إيه فينا اكثر من عملتوه وبتعملوه كل يوم
شوقي : (هامسا لتامر) ساعدني أخذ الورق منها .. ولك مكافئة كبيرة
تامر : لو قربت منها هندفك هنا .. روح لمديرك وبلغه إننا هنشهد بكل اللي
نعرفه عنه (يخرج شوقي مذعورا)
هدي : (لسعيد) أنت قدرت تهرب منهم أزاى
سعيد : قول إيه اللي خلاني اهرب .. بمجرد ما شوفت السلاح في ايدهم
لاقيت نفسي باجري ذي الرهوان .. ما هو الخوف يخلي السلحفاة طيارة
تامر : تصدقي انه كان بيجري ذي العدائين .. لما قطع نفسهم ونفسي (يدخل
سالم)
هدي : أنا رايحة ال (تري سالم . تتوقف . بسعادة) سالم أنت بخير
سالم : الحمد لله
هدي : أذاى سابوك تخرج
سالم : غافلتهم في المستشفى وجيت
هدي : بس ده خطر عليك .. الجرح لسه ما لمش
سالم : أنا أحسن دلوقتي (لسعيد) خدوا منك السي دي
سعيد : (يخرج السي دي) في الحفظ والصون
تامر : بس هما أكيد مراقبينك
سالم : (هامسا) بيني وبينكم أنا بلغت البوليس من كام يوم من ساعة ما
الناس دي بدؤا يترددوا علي البيت والبوليس عاملهم كمين
هدي : أنا ها روح ابلغ النيابة الإدارية عن التجاوزات اللي في المديرية
سالم : (لهدي) أنا كنت عاوز أشكرك علي وقفك معايا.. الزملاء بلغوني أول
ما وصلت بكل حاجة

هدي : أحنا اللي نشكرك اللي حركت جوانا .. مشاعر الرفض للي بيسرقوا

اجمل ما في بلدنا .. بيسرقوا روحها وعزيمتها (يدخل راضي)

راضي : الحقي يا مدام هدي

هدي : فيه إيه يا راضي

راضي : بنتك حناء اتخطفنا (هدي تسقط مغشيا عليها)

سالم : (يحاول افاقتها) هدي

هدي : بنتي .. عاوزة بنتي

سالم : نبلخ البوليس

تامر : مش لما نعرف مين اللي خطفها

هدي : أكيد شوقي

سعيد : وممكن تكون الناس اللي طاردتني وطعنت سالم

سالم : نستني وهنعرف

راضي : أنا باقول نبلخ البوليس وهما يتصرفوا (يدخل ضابط في ملابس

مدنية)

الضابط : أحنا عارفين ومتابعين الوضع ما تقلقوش

هدي : بنتي يا حضرة الضابط

الضابط : بنتك هترجعك واللي خطفوها هيا خذوا جزائهم لما يتصلوا

.. المهم مش عاوز حد يعرف بوجودنا في المصلحة

هدي : أتفضل حضرتك الأوراق دي بتدين المدير العام وبعض

الموظفين هنا

الضابط : شاكرين تعاونك معنا (يخرج الضابط)

هدي : يا تري أنت فين يا بنتي

سعيد : مؤكد هترجع لنا بالسلامة (يدخل مروان متخفيا .)

سعيد : (لمروان) أنت مين
مروان : أنا مروان .. متخافوش أنا بخير
سالم : كويس انك قدرت تهرب منهم .. بس إيه اللي جابك هنا .. مش
خايف يكونوا جايين وراك
مروان : اصلي اتفقت مع الهيئة العربية علي تبني بحثي .. خلاص بحثي
هيطلع للنور والبلد هستفيد منه
سالم : مبروك (يناوله السي دي) الأمانة
مروان : متشكر يا سالم
سعيد : وأنا اللي جريت بيه وودوخت العدا ورايا
تامر : وأنا مالحقتمش
مروان : متشكر لكم كلكم .. اروح اسلم البحث (يخرج مروان يدخل
مدحت و خلفه شوقي)
مدحت : بقي كده تبلغوا عني وتعادوني .. طيب هنشوف مين اللي هيضحك
في الآخر
سالم : مؤكد اللي علي حق هو اللي هيكسب
مدحت : كده يا سالم .. وأنا اللي اصدرت قرار بترقيتك وكيل مديرية .. مش
بس كده أنا لاقيت ضامن هيدخل مكانك يعني من الشهر الجاي مرتبك
هيفرج البنك عنه وآدي فلوسك اللي أنا مديون لك بيها عشان تغير فكرتك
اللي واخدها عن رئيسك اللي بيحبك .. بعد ده كله تعمل معايا كده
سالم : أنت رجعت حقي متأخر عن ميعاده .. كان ممكن أكون اسعد إنسان
في الدنيا لو ما عرفتش البلاوي اللي سيادتك عاملها في الناس والبلد
مدحت : يعني إيه .. نوبتوا تتخلوا عني يا جماعة
هدي : أنت اللي أتخليت عن نفسك لما سرقت حق غيرك

شوقي : وأنا .. أنا ذنبي إيه أنا كنت بانفذ أوامر البيه وبس .. أجرمت يعني

سعيد : أجرمت ولازم تتحمل نتيجة غلطتك

تامر : طول عمرك خايب يا شوقي

شوقي : أنا لو ضعت ها خد الكل في رجليه .. حتي مدحت بيه

مدحت : انتة أتجننت

شوقي : ايوه أتجننت .. طالما مش قادر تحميني ولا تحمي نفسك .. أتصرف

أنا بقي (لهدي) علي فكره بنتك عندي أنا .. ايوه أنا اللي خاطفها أنا

وسيادة المدير

مدحت : أنا قولت لك اخطف حد

شوقي : مش قولت ليه أتصرف

خلاص أنا أتصرفت .. (لهدي) و لو أتورطت في أي حاجة من قريب أو بعيد

هيكون ليه تصرف تاني مع بنتك (يدخل الضابط)

الضابط : (لشوقي) كده أنت دخلت السجن من أوسع أبوابه .. أنت والمدير

العام .. تعالوا معانا (صوت رصاص) مين اللي ضرب الرصاص ده (يدخل

مروان مصابا)

سالم : مروان

مروان : الحق المجرمين قتلوني وخذوا البحث

الضابط : (لمروان) اللي عاملوا فيك كده مش هيفلتوا (يخرج الضابط)

سالم : هاتوا الإسعاف

مروان : حياتي مش مهم .. المهم هو البحث

(يدخل رجلا الإسعاف يحملان مروان)

مروان : خليك هنا يا سالم .. ودور علي البحث وسلمه للدولة (يخرج مروان)

سالم : حاضر يا اعز الاصدقاء (تدخل حسناء)

حسنا : ماما

هدي : أنتي بخير يا بنتي .. حد من المجرمين عمل فيكي حاجة

حسنا : أنا بخير يا ماما .. ما تخافيش عليه .. حضرة الظابط خلصني من ايد

الناس دي (تشير لشوقي) خلاص يا ماما نويت اسمع كلامك وأخذ الحياة

بجدية وأخذ شهادة ذي ما أنتي عاوزة

هدي : (تحضنها) بنتي حبيبتي

تامر : (لسالم) بصفتك بدل المدير العام مؤقتا .. إيه أول قرار هاتأخده

راضي : تطهير المديرية من الفساد طبعا

سالم : أول قرار هاطلب أيد الإنسانة اللي بأحبها (مشيرا لهدي)

هدي : صحيح يا سالم .. ده يوم المنى

سالم : يعني أنتي موافقة

راضي : أنت لسه ما فهمتش

سعيد : وتاني قرار

سالم : هارجع للمدارس من تاني

راضي : (متعجبا) بتقول إيه

سالم : ده القرار اللي كان لازم أخده من زمان

سعيد : بعد ما أترقيت

سالم : أنا عمري ما نسيت أني مدرس تاريخ .. وان التاريخ هو ذاكرة الأمة

اللي لازم نحافظ عليه .. ونعلمه لأولادنا عشان يحترموا ماضيهم

ويفهموا حاضرهم ويقدرُوا يتعاملوا معاه بشرف

سعيد : هترجع تاني للطباشيرة

سالم : الطباشيرة يا ما خرجت علماء في كل المجالات

هدي : وأنا معاك في أي قرار تأخده

حسنا : وأنا أول تلامذتك (يدخل الضابط)
تامر : أبشركم .. قبضنا علي داود و يوسف .. والبحث بقي في أيدين أمينة
سالم : صحيح .. أنا باقول نروح نبشر مروان في المستشفى
هدي : أكيد هيفرح لما نبلغه
الضابط : للأسف مروان مات قبل ما يوصل المستشفى
سالم : مات .. يا تري كام عالم ماتوا في حب البلد .. والبلد مش دريانه ..
دمك مش هيروح هدر يا أخلص العلماء

ستار

الاسم : محمد عبد الحميد عبد الرحمن خطاب
الأعمال السابقة :

لعبة الأساتذة : نشرت بسلسلة (أعمال مصرية) و

تم عرضها بمهرجان قنا ٢٠٠٣ فرقة موط المسرحية

اخراج رمضان خضر

الخروج من الأسر : نشرت بسلسلة (مسرحيات مصرية)

غنوة للسلام : عرضت ضمن عروض المسرح المدرسي

اخراج محمد بركة

المبروك : الشباب والرياضة اخراج عبد الرحمن خلوي

وبعض الاعمال الاذاعية : والله مظلوم . الخونة اخراج احمد نافع

ابطال من البوسنة : سلسلة (نصوص مسرحية) تحت الطبع

تليفون : ٠١٢٨٢٨٢٥٩٣٧